



MALAYSIA

# PENYATA RASMI PARLIMEN

*Parliamentary Debates*

## KAMAR KHAS

*Special Chamber*

**PARLIMEN KEEMPAT BELAS  
PENGAL KEEMPAT  
MESYUARAT KEDUA**

## K A N D U N G A N

### UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Status Penaiktarafan Sistem Perparitan Bagi  
Mengatasi Masalah Banjir di Taman Sri Wangsa**  
- *YB. Datuk Dr. Shahrudin bin Md Salleh (Sri Gading)* (Halaman 1)
- **Pembukaan Semula Sektor Ekonomi Dalam  
Keadaan Endemik COVID-19**  
- *YB. Tuan Khoo Poay Tiong (Kota Melaka)* (Halaman 4)

**MALAYSIA  
KAMAR KHAS  
PARLIMEN KEEMPAT BELAS  
PENGAL KEEMPAT  
MESYUARAT KEDUA**

**Khamis, 28 Oktober 2021**

**Mesyuarat dimulakan pada pukul 2.30 petang**

**DOA**

*[Tuan Yang di-Pertua **mempengerusikan Mesyuarat**]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Status Penaiktarafan Sistem Perparitan Bagi  
Mengatasi Masalah Banjir di Taman Sri Wangsa**

**2.34 ptg.**

**Datuk Dr. Shahrudin bin Md Salleh [Sri Gading]:** Tuan Yang di-Pertua, boleh saya buka? Yang Berhormat Timbalan Menteri Kementerian Alam Sekitar dan Air (KASA) dan Yang Berhormat Menteri Kesihatan, rakan saya Yang Berhormat Kota Melaka, tuan-tuan dan puan-puan yang dihormati sekalian. *Assalamualaikum warahmatullahi wabarakatuh* dan selamat sejahtera.

Saya membawakan isu dan masalah setempat tentang status penaiktarafan sistem perparitan bagi mengatasi masalah banjir di Taman Sri Wangsa, Batu Pahat. Tuan Yang di-Pertua, Taman Sri Wangsa merupakan sebahagian daripada kawasan pengundi bagi Parlimen Sri Gading termasuk juga sebenarnya Parlimen Batu Pahat. Kawasan ini sering terlibat dalam bencana alam terutama banjir. Sejak taman ini dibina pada 21 tahun yang lepas iaitu pada tahun 2000, masalah banjir ini masih belum dapat diatasi.

Kawasan Taman Sri Wangsa ini juga merupakan kawasan dalam Majlis Perbandaran Batu Pahat yang merupakan kawasan berisiko tinggi untuk tenggelam seperti kajian yang telah dilakukan oleh Fakulti Kejuruteraan Awam dan Alam Sekitar daripada Universiti Tun Hussein Onn Malaysia (UTHM), Sri Gading yang letaknya dan di Sri Gading. Tambahan pula, Batu Pahat juga merupakan kawasan yang turut terkena tempas banjir kilat akibat hujan lebat.

Sebagai contoh, baru-baru ini pada 24 Ogos 2021, hujan lebat berterusan telah berlaku selama dua jam ditambah pula dengan pertembungan fenomena air pasang

menyebabkan banjir kilat kawasan Taman Sri Wangsa sedalam 0.8 meter dua kaki lebih. Menurut Pegawai Angkatan Pertahanan Awam (APM) daerah Batu Pahat, Leftenan Mohd. Faezie Abdul Aziz, keadaan tersebut menyebabkan air pasang setinggi 1.4 meter, lebih kurang empat kaki pada jam 8.00 pagi sehingga mengakibatkan limpahan air ke kawasan yang terlibat seperti Taman Sri Wangsa dan kawasan sekitarnya.

Tuan Yang di-Pertua, daripada banjir kilat tersebut hampir 300 penduduk sekitar Taman Sri Wangsa yang kebanyakan adalah mereka ini pembeli awal, penjawat awam, kakitangan sokongan dan taman-taman yang bersebelahan terkesan, banyak taman di situ sebenarnya dan juga kampung-kampung tradisi. Rata-rata daripada mereka sudah hilang aset dan barangan berharga seperti barangan perabot dan barangan elektrik kerana kesan daripada banjir tersebut.

Antara faktor yang telah diselidiki adalah kerana sistem perparitan yang tidak sempurna, pembinaan titi-titi konkrit *culvert* yang tinggi rendah dan sebagainya, tidak diselenggarakan dengan baik menyebabkan air tidak boleh mengalir sekali gus mengakibatkan banjir berlaku. Selain itu, sistem longkang utama kawasan Taman Sri Wangsa yang agak kecil dan tidak mampu menampung lambakan air hujan turut menjadi punca utama banjir berlaku di kawasan itu.

Tuan Yang di-Pertua, saya memohon penjelasan kepada Kementerian Alam Sekitar dan Air apakah status dan inisiatif daripada pihak kementerian untuk menyelesaikan isu sistem perparitan di Taman Sri Wangsa ini. Persoalan ini penting untuk dijawab kerana ini bukanlah isu yang baharu, tetapi sudah hampir 21 tahun penduduk sekitar Taman Sri Wangsa menyatakan pandangan dan keresahan mereka namun belum ada sebarang penyelesaian. Terima kasih banyak.

**2.38 ptg.**

**Timbalan Menteri Alam Sekitar dan Air [Dato' Mansor bin Othman]:** *Bismillahi Rahmani Rahim. Assalamualaikum warahmatullaahi wabarakaatuh.* Terima kasih, Tuan Yang di-Pertua. Terima kasih, Yang Berhormat Sri Gading.

Kementerian Alam Sekitar dan Air (KASA) mengambil berat dan melahirkan rasa simpati akan masalah banjir yang berlaku di kawasan Taman Sri Wangsa ini. Yang Berhormat, KASA juga pernah melawat satu lagi kawasan di Batu Pahat yang telah dilanda banjir sebelum itu iaitu Sri Medan pada 9 September 2021 yang lepas.

Untuk makluman Yang Berhormat Sri Gading, berdasarkan rekod, terdapat satu kejadian banjir kilat pada tahun 2021, di daerah Batu Pahat pada 24 Ogos 2021, jam 10.00 pagi sehingga 25 Ogos 2021, jam 11.00 pagi melibatkan Jalan Parit Besar dan Kampung Bindu yang telah mengakibatkan kawasan seperti Taman Sri Wangi, Parit Haji

Ali, Jalan Panchor dan Parit Besar mengalami banjir kilat dengan purata kedalaman 0.4 meter hingga 0.7 meter.

Mengikut rekod Stesen Hujan Sungai Simpang Kanan, di Parit Besar, mencatatkan dua siri kejadian hujan iaitu pada 24 Ogos 2021, bermula jam 6.00 pagi dan 25 Ogos 2021, bermula jam 4.00 pagi. Hujan yang sangat lebat dengan jumlah hujan maksimum sebanyak 132 milimeter dalam tempoh dua jam yang direkodkan pada 24 Ogos 2021, antara penyumbang utama kepada kejadian banjir kilat ini.

Selain itu, antara punca lain dikenal pasti yang menyumbang kepada kejadian bencana banjir di kawasan ini ialah sistem saliran yang tidak sempurna akibat daripada halangan struktur pada sistem saliran sedia ada seperti *culvert*, jambatan dan paip yang menghalang kelancaran aliran air pada sistem saliran berhampiran Taman Sri Wangsa ini.

Seperti Yang Berhormat sedia maklum kawasan banjir ini juga terletak kira-kira sembilan kilometer dari muara sungai yang mana menerima kesan langsung daripada fenomena air pasang yang direkodkan setinggi 2.5 meter pada 25 Ogos 2021, jam 11.40 malam dan seterusnya memburukkan lagi keadaan banjir di kawasan ini.

Untuk makluman Ahli Yang Berhormat juga, menurut Akta Jalan, Parit dan Bangunan 1974 [Akta 133], tanggungjawab untuk membina dan menyelenggarakan parit adalah di bawah pihak berkuasa tempatan (PBT). Selain itu, keputusan Jemaah Menteri tahun 1996, telah menggariskan pembahagian tanggungjawab di antara pihak berkuasa tempatan (PBT) dan juga JPS. Semua sistem saliran dalaman iaitu sistem saliran buatan adalah di bawah tanggungjawab PBT. Manakala, sistem saliran asalnya, semula jadi, iaitu sungai dan anak sungai adalah di bawah JPS.

Walau bagaimanapun, Jabatan Pengaliran dan Saliran daerah Batu Pahat telah mengambil inisiatif proaktif untuk membantu PBT dengan melaksanakan kerja-kerja penyelenggaraan saliran utama di parit besar secara berkala, setiap tahun menggunakan peruntukkan kerajaan negeri bagi memastikan air sentiasa lancar ke muara. Dalam pada itu, bagi kawasan-kawasan Parlimen Batu Pahat dan khususnya Parlimen Sri Gading, KASA melalui JPS Malaysia, telah membantu kerajaan negeri dan pihak berkuasa tempatan dengan melaksanakan projek pemuliharaan sungai untuk mengurangkan risiko banjir di bawah inisiatif Program Strategik Memperkasa Rakyat dan Ekonomi Tambahan (PEMERKASA Plus), sebanyak RM12,550 telah diperuntukkan bagi melaksanakan 10 kerja bagi mengurangkan risiko banjir di Parlimen Sri Gading.

Manakala, sebanyak RM164,350 dengan melaksanakan lima kerja di Parlimen Batu Pahat. Manakala, di bawah kerja-kerja penyelenggaraan kolam takungan banjir tahun 2021, sebanyak RM370,780 telah diperuntukkan bagi melaksanakan 39 unit kolam takungan banjir di Parlimen Batu Pahat. Bagi langkah jangka panjang untuk

mengurangkan kesan banjir di Parlimen Batu Pahat, JPS telah meluluskan Projek Rancangan Tebatan Banjir (RTB) Sungai Batu Pahat dengan kos projek sebanyak RM48.5 juta dan ia dalam proses pelantikan perunding.

Selain itu, Projek Menaik Taraf Sistem Saliran Mesra Alam Daerah Batu Pahat, Johor juga telah dimohon di dalam *Rolling Plan 2*, RMKe-12 dengan kos projek sebanyak RM32 juta. Bagi pendekatan bukan struktur, Jabatan Pengairan dan Saliran, sentiasa bersedia menghadapi bencana banjir dengan memantau status masa curahan hujan dan aras air sungai utama seluruh Malaysia. Rumah Ramalan dan Amalan Banjir Negara memantau secara *online* status masa curahan hujan dan aras air sungai utama seluruh Malaysia di laman sesawang yang dibina oleh jabatan.

Pemantauan secara langsung ini dengan kerjasama daripada lain-lain agensi seperti MET Malaysia, Agensi Pengurusan Bencana Negara (NADMA) serta JPS negeri akan dapat meningkatkan keupayaan hebahan supaya dapat memberikan tempoh masa yang mencukupi untuk penduduk dan agensi yang bertanggungjawab melaksanakan persediaan awal dalam menghadapi banjir dan tindakan awal pemindahan penduduk.

Selain itu, sebagai usaha pendidikan kemasyarakatan, orang ramai juga diingatkan untuk tidak membuang sampah merata-rata dan menjaga persekitaran supaya aliran sungai dan perparitan tidak terhalang lalu memburukkan lagi keadaan dan menyebabkan banjir kilat berlaku. Sekian, terima kasih.

### **Pembukaan Semula Sektor Ekonomi Dalam Keadaan Endemik COVID-19**

**2.45 ptg.**

**Tuan Khoo Poay Tiong [Kota Melaka]:** Tuan Yang di-Pertua, tajuk ucapan pada Kamar Khas petang ini ialah “Pembukaan Semula Sektor Ekonomi dalam Keadaan Endemik COVID-19”.

Tuan Yang di-Pertua, pada bulan lepas, sekumpulan pengusaha daripada sektor perkilangan dan perdagangan dari negeri Melaka telah mengadakan perjumpaan dengan saya secara atas talian. Tujuan perjumpaan tersebut adalah untuk membincangkan masalah-masalah yang dihadapi oleh mereka daripada segi pembukaan semula ekonomi.

Pihak kerajaan telah menyatakan bahawa wabak COVID-19 akan menjadi endemik di negara kita. Ini bermakna rakyat, termasuklah para peniaga dan kilang-kilang, perlu terus ‘hidup bersama’ virus ini dalam jangka masa yang panjang.

Dalam konteks ini, mereka telah membangkitkan beberapa isu dan permasalahan untuk pihak kerajaan pertimbangan. Pertama ialah vaksinasi dan penutupan kilang. Para pengusaha menzahirkan masalah yang dihadapi mereka walaupun semua pekerja telah divaksinasikan. Ini adalah kerana mereka yang telah lengkap divaksin masih berisiko dijangkiti COVID-19, terutamanya dengan kemunculan varian-varian baharu. Setiap kali seseorang pekerja didapati positif COVID-19, saringan akan dijalankan terhadap semua pekerja. Pekerja-pekerja yang kemudiannya didapati positif sudah tentunya perlu dikuarantin.

Namun, mereka yang negatif juga perlu dikuarantin kerana terdapat kontak rapat. Dalam beberapa kes, Jabatan Kesihatan mungkin mengarahkan kilang tersebut ditutup selama 14 hari. Perkara ini menyebabkan kilang ataupun kedai terpaksa ditutup berulang kali, walaupun pekerja telah divaksinasikan. Ini mengganggu kelangsungan operasi mereka. Terdapat beberapa syarikat yang terpaksa 'buka dan tutup' berulang kali dalam tempoh dua hingga tiga bulan. Jadi, mereka rasakan seperti *back to square one* walaupun semua pekerja telah di vaksin.

Maka, saya memohon pandangan kerajaan dalam perkara ini, khususnya sama ada kerajaan akan memperbaharui atau memperkenalkan SOP baharu yang bersesuaian dengan situasi semasa. Sebagai contoh, adakah munasabah jika pekerja yang negatif dibenarkan terus bekerja walaupun ada kontak rapat. Jika tidak, apakah langkah-langkah ataupun garis panduan yang boleh diberi kepada para pengusaha ini.

Isu yang kedua ialah pemantauan kuarantin. Pengenalpastian kontak rapat (*contact tracing*) dan kuarantin sememangnya aspek yang penting dalam menangani wabak COVID-19. Namun, terdapat pekerja, sama ada warga asing atau tempatan, yang melanggar perintah kuarantin. Perkara ini boleh disahkan oleh saya sendiri kerana pejabat saya sering mendapat aduan bahawa ada pekerja bergelang *pink* yang kelihatan keluar membeli barang keperluan asas.

Perkara ini amat rumit kerana sukar dipantau dan pada masa yang sama, kebanyakan pekerja asing tinggal bersama di asrama dan memerlukan barang keperluan asas ketika menjalani kuarantin. Oleh itu, prosedur dan kaedah kuarantin perlu dikaji semula. Daripada segi ini, pihak pengusaha menyatakan mereka sedia bekerjasama dengan pihak kerajaan untuk menubuhkan lebih banyak pusat kuarantin setempat bagi memastikan proses ini boleh dilaksanakan dengan lebih teratur dan berkesan. Dengan ini saya memohon penjelasan lanjut daripada pihak kerajaan. Sekian, terima kasih.

**2.50 ptg.**

**Timbalan Menteri Kesihatan II [Datuk Aaron Ago Dagang]:** Terima kasih, Yang Berhormat. Tuan Yang di-Pertua, saya melihat isu ini terbahagi kepada dua, iaitu vaksinasi dan penutupan kilang menjurus kepada SOP yang baharu. Kedua, adalah kaedah atau prosedur kuarantin.

Kerajaan telah menetapkan kadar vaksinasi lengkap COVID-19 sebagai salah satu syarat untuk pengoperasian bagi sektor ekonomi termasuk sektor pembuatan, pembinaan, perlombongan dan pengkuarian iaitu:

- (i) kadar vaksinasi lengkap 80 hingga 100 peratus dibenarkan beroperasi dengan kapasiti 100 peratus pekerja; dan
- (ii) kadar vaksinasi lengkap kurang 80 peratus dibenarkan beroperasi dengan kapasiti sehingga 80 peratus pekerja sahaja

Ini adalah untuk memastikan pengurangan daripada segi risiko jangkitan COVID-19 dan kejadian kluster di tempat kerja. Walau bagaimanapun, apabila berlaku jangkitan di tempat kerja, garis panduan standard (SOP) yang telah ditetapkan perlu dipatuhi bagi memastikan rantai jangkitan dapat diputuskan dan seterusnya mengelakkan kepada *breakthrough* infection atau jangkitan COVID-19 kepada individu yang telah diberi vaksinasi lengkap dalam kalangan warga kerja.

Penutupan premis untuk siasatan kes dan kontak serta menjalankan proses disinfeksi adalah penting untuk memutuskan rantai jangkitan COVID-19 di tempat kerja dan seterusnya mengelakkan berlakunya wabak yang tidak terkawal. Penutupan ini dilaksanakan selepas penilaian risiko dijalankan oleh anggota Kementerian Kesihatan Malaysia (KKM) dan agensi yang diturunkan kuasa di bawah seksyen 3, Akta Pencegahan dan Pengawalan Penyakit Berjangkit 1988 [*Akta 342*] termasuk Polis Diraja Malaysia (PDRM), Kementerian Perdagangan Antarabangsa dan Industri (MITI), Kementerian Perdagangan Dalam Negeri dan Hal Ehwal Pengguna (KPDNHEP), Jabatan Imigresen Malaysia (JIM), pihak berkuasa tempatan (PBT), Dewan Bandaraya Kuala Lumpur (DBKL), Jabatan Tenaga Kerja (JTK), Jabatan Kesihatan dan Keselamatan Pekerjaan (JKKP) dan Jabatan Pengangkutan Jalan (JPJ). Taklimat berkaitan prosedur penutupan premis telah disampaikan kepada agensi-agensi terlibat dan SOP penutupan premis di bawah subseksyen 18(1)(f) Akta Pencegahan dan Pengawalan Penyakit Berjangkit juga telah diedarkan.

Kementerian Kesihatan Malaysia (KKM) telah menyemak semula garis panduan sedia ada bagi tempoh masa kuarantin dan telah dikemas kini melalui Surat Pekeliling Ketua Pengarah Kesihatan Bil. 16/2021 bertarikh 16 Oktober 2021. Mengambil kira bukti saintifik dan situasi semasa, Kementerian Kesihatan Malaysia juga telah menyemak



semula tempoh pengawasan dan pemerhatian dalam kalangan individu kontak rapat atau kuarantin kepada kes positif COVID-19, kepada ketetapan baharu seperti berikut:

- (i) tempoh berkenaan dipendekkan dari 14 hari kepada tujuh hari bagi individu yang telah menerima dos lengkap vaksin; dan
- (ii) tempoh berkenaan dipendekkan dari 14 hari kepada sepuluh hari bagi individu yang belum lengkap divaksin atau tidak menerima vaksin.

Pelepasan daripada menjalani perintah pengawasan dan pemerhatian akan diberikan kepada kontak rapat kepada kes positif COVID-19 apabila syarat-syarat berikut dipatuhi:

- (i) menjalani ujian ulangan PCR COVID-19 pada hari kelima, kalau kuarantin bagi tempoh tujuh hari. Sekiranya keputusan ujian ulangan tersebut didapati negatif, mereka akan diberikan pelepasan dari menjalani kuarantin pemerhatian hari kelapan; atau
- (ii) menjalani ujian ulangan PCR COVID-19 pada hari kelapan, sekiranya menjalani kuarantin bagi tempoh sepuluh hari. Sekiranya keputusan ujian ulangan tersebut didapati negatif, mereka akan dikeluarkan dari pusat kuarantin pada hari ke-11.

Oleh yang demikian, pekerja-pekerja kontak rapat kepada kes positif adalah tertakluk kepada garis panduan terbaharu ini, iaitu bagi yang lengkap divaksin, mereka diwajibkan untuk kuarantin selama tujuh hari. Manakala yang tiada atau tidak lengkap vaksin adalah 10 hari. Selain itu, majikan-majikan juga hendaklah membuat penilaian sendiri COVID-19 iaitu mengamalkan *Test, Report, Isolate, Inform and Seek Treatment* (TRIIS) untuk mengelakkan pekerja sama ada yang telah di vaksinasi atau yang belum lengkap vaksinasi daripada dijangkiti dan seterusnya mengelakkan daripada penutupan premis berkali-kali.

Bagi isu kedua, berkenaan dengan kaedah kuarantin. Berdasarkan subseksyen 15(1) Akta Pencegahan dan Pengawalan Penyakit Berjangkit 1988 [Akta 342], mana-mana pegawai diberi kuasa boleh memerintahkan kontak iaitu mana-mana orang yang telah terdedah atau mungkin telah terdedah kepada risiko dijangkiti Penyakit Koronavirus 2019 (COVID-19), termasuk mana-mana orang yang baru tiba dari sesuatu kawasan jangkitan (berdasarkan tafsiran di bawah Seksyen 2 Akta 342, supaya menjalani pengawasan dan pemerhatian di mana-mana tempat yang diiktirafnya patut sehingga mereka boleh dilepaskan dari kuarantin tanpa membahayakan orang ramai.

Bagi tujuan pematuhan tersebut, kontak ini akan diberikan surat perintah kuarantin ataupun *Order for Surveillance and Observation* (HSO). Terdapat beberapa kategori, ada empat kategori kontak yang akan diberikan surat HSO adalah:

- (i) Kategori A iaitu mana-mana warganegara, pemastautin tetap Malaysia, ekspatriat atau kor diplomatik atau mana-mana orang asing lain yang dibenarkan oleh Ketua Pengarah Imigresen memasuki Malaysia dari luar negara;
- (ii) Kategori B iaitu kontak rapat kepada kes positif;
- (iii) Kategori COVID-19 iaitu individu yang tinggal dalam kawasan yang dilaksanakan Perintah Kawalan Pergerakan Diperketatkan (PKPD); dan
- (iv) Kategori D iaitu individu yang diberi perintah pengawasan dan pemerhatian oleh pegawai diberi kuasa, contohnya individu yang pulang dari kawasan berisiko tinggi.

Kalau dulu, biasanya orang dari Sabah datang ke *West Malaysia* diberi kuarantin, macam itulah yang berisiko tinggi di mana berlakunya penularan jangkitan yang tinggi. Mana-mana individu yang diberikan HSO ini dipakaikan gelang pengawasan bagi memudahkan pengenalpastian individu ini di lapangan sekiranya individu ini keluar dari premis yang ditetapkan untuk pengasingan.

Arahan pemakaian gelang pengawasan bagi Kategori A di atas adalah berdasarkan subperaturan 8(3) Peraturan-peraturan Pencegahan dan Pengawalan Penyakit Berjangkit (Langkah-langkah di dalam Kawasan Tempatan Jangkitan) (No. 8) (2020). Manakala, keperluan pemakaian gelang pengawasan ke atas Kategori B, C dan D adalah berdasarkan syarat dalam perintah yang dikeluarkan oleh pegawai diberi kuasa di bawah seksyen 15, Akta 342.

Bagi mana-mana warganegara, pemastautin tetap Malaysia, ekspatriat atau kor diplomatik atau mana-mana orang asing lain yang dibenarkan oleh Ketua Pengarah Imigresen yang baru masuk ke Malaysia dan telah diarahkan untuk tinggal di stesen kuarantin atau dibenarkan menjalani pengawasan dan pemerhatian di tempat kediaman iaitu Kategori A dan didapati tidak mematuhi Peraturan 8(3), ia merupakan satu kesalahan di bawah peraturan 11(1) Peraturan-peraturan Pencegahan dan Pengawalan Penyakit Berjangkit (Langkah-langkah di dalam Kawasan Tempatan Jangkitan) (No. 8) (2020). Kesalahan ini merupakan kesalahan yang boleh di kompaun tidak melebihi RM1,000.

Bagi Kategori (B), (C) dan (D) yang didapati melanggar perintah pegawai diberi kuasa, merupakan kesalahan di bawah seksyen 22(b) Akta 342 yang merupakan kesalahan yang boleh di kompaun di bawah Peraturan-peraturan Pencegahan dan

Pengawalan Penyakit Berjangkit (Pengkompunan Kesalahan-kesalahan) (Pindaan) (No. 12) (2020) tidak melebihi RM 1000.00. Jika didapati bersalah dan disabitkan kesalahan, boleh juga dipenjarakan selama tempoh tidak melebihi dua tahun atau didenda di bawah seksyen 24(a) Akta 342.

Individu yang sedang menjalani kuarantin dan dipantau oleh pegawai-pegawai diberi kuasa di bawah seksyen 3 Akta 342. Selain daripada pegawai-pegawai kementerian, terdapat 22 kementerian juga terlibat dalam aktiviti ini dan bagi mengkompun ada 11 agensi yang boleh memberikan kompau kepada kesalahan-kesalahan di bawah akta tersebut.

Di samping itu, kerajaan telah melaksanakan penggunaan Perintah Pengawasan dan Pemerhatian secara digital dalam aplikasi MySejahtera mulai 15 Julai 2020 bagi pengembara dari luar negara dan bagi kontak kes positif dan kes positif adalah mulai 1 Ogos 2021. Individu dalam kategori kontak akan diberi perintah pengawasan dan pemerhatian secara digital dalam aplikasi MySejahtera dalam tempoh tarikh kuarantin. Dalam pelaksanaan SOP, semua premis diwajibkan untuk pelanggan mengimbas kod QR untuk masuk ke premis masing-masing. Sesiapa yang sedang menjalani Perintah Pengawasan dan Pemerhatian adalah tidak dibenarkan untuk masuk ke premis tersebut.

Ini adalah untuk menjawab yang dikatakan oleh Yang Berhormat tadi, dilihat mereka yang memakai gelang *pink*, keluar masuk. Sehingga 25 Oktober 2021, terdapat sebanyak 1,612 stesen kuarantin telah diwartakan, di mana 180 buah sedang aktif digunakan di seluruh negara setakat ini. Majikan boleh menempatkan pekerja-pekerja di stesen-stesen kuarantin yang diwartakan dengan kos kuarantin adalah di bawah tanggungan majikan. Kementerian Kesihatan akan terus memantau individu yang sedang menjalani perintah pengawasan dan pemerhatian. Individu yang gagal mematuhi peraturan perintah ini adalah satu kesalahan dan boleh didakwa. Semua individu yang sedang menjalani perintah ini adalah dinasihatkan untuk mematuhi perintah tersebut.

Untuk makluman semua, sehingga kini, jumlah kompau yang dikeluarkan kepada individu yang melanggar peruntukan di bawah Akta 342 Perintah Pengawasan, Pemerhatian dan Pengawasan sehingga 24 Oktober 2021 adalah seperti berikut:

- (i) seksyen 11(3)(b) Akta 342 iaitu arahan pegawai diberi kuasa supaya sesorang diasingkan, diperhatikan atau diawasi dengan jumlah dalam kategori ini ialah enam;
- (ii) seksyen 14 Akta 342 iaitu pengasingan orang yang dijangkiti dan orang yang disyaki dipindah ke stesen kuarantin dengan jumlah kompau: 172; dan

- (iii) seksyen 15 iaitu pemerhatian dan pengawasan kontak. Jumlah adalah sebanyak 569

Sekian, terima kasih.

**Tuan Yang di-Pertua:** Terima kasih Yang Berhormat Timbalan Menteri. Ahli-ahli Yang Berhormat semua, Mesyuarat Kamar Khas hari ini ditangguhkan sehingga hari Isnin, 1 November 2021, jam 2.30 petang. *Assalamualaikum*. Terima kasih, salam sejahtera.

***[Kamar Khas tamat pada pukul 3.03 petang]***